

www.BibleForChildren.org

Matiyu 8



Te peglihad e te daruwa ne aldew, due kasal diye te lungsud te Kana ne sakup te Galiliya. Ne migtambung ka iney ni Hisus, wey inninggat degma ensi Hisus duma te me hibateen din.



Te naamin e ka eg-inumen ne binu, migkahiyang e si Hisus te iney rin, "Naaminan e sikandan te binu." Nataman, migkahiyang e te iney ni Hisus ka me suluhuanen, "Himuwa niyu ka minsan nekey ne igsuhu din kaniyu."



Ne migkahiyang ni Hisus ka me suluhuanen,
"Hipenua niyu te weyig ka hen-em ne
banga." Ne miggipenu dan en iya seeye.



Nataman, migkahiyang e man-e sikandan ni Hisus, "Na, sakug kew naan e due te weyig wey uyana niyu diye te migpangulu te seini ne sahakeen." Ne intuman dan iya seeye.



Ne miggeraman e degma te migpangulu te kasal ka weyig ne neyimu ne binu, piru ware sikandin nakanengneng ke hendei migpuun ka binu. (Piru nakanengneng e ka me suluhuanen ne migsakug te weyig.)



Seeye naa, impeumew rin e ka egpangasawa wey migkahiyang, "Nabatasan te kasuluhan ne iyan iggun-a igsendad ka subla ne mananam ne binu ne igpeinum te me mahaliyug. Ne emun ke dakel e ka egkeinum dan, henduen pad ka kene amana ne meupiya ne binu. Piru sikeykew mule, kunteen nud e ipalihawang ka subla ne mananam ne binu!"



Sika ka an-anayan ne innimu ni Hisus ne kein-inuwan diye te Kana ne sakup te Galiliya.


Impakita rin ka karesen din,
wey migpalintutuu kandin
wey migsalig ka me
hibateen din.



Ne migpanumbaley si Hisus diye ki
Pidru. Ne dutu nakita rin ka anuhang ni
Pidru ne malitan ne miggibat su
miglusungan.



Ne miggen-gehan ni Hisus ka belad te malitan, ne due-rue ne neulian sikandin. Ne mig-enuw sikandin wey intanggu rin e ensi Hisus.




Te seeye ne maapun, te miglineb e ka aldew,
impanguyan te me etew diye te ki Hisus ka langun ne
migmanderalu wey ka
migpanerepan te me
busew. Ne susuluhi ne
me etew te seeye ne
siyudad ka miglibulung
diye te lama te baley.



Ne impamawian ni Hisus ka masulug ne egmanderalu te nalein-lein ne egmanggeramen dan, wey impangalew rin degma ka masulug ne me busew piru ware din palalaha tenged su nekeila sikandan kandin.



Amana iya egkeupian ka langun ne etew ne
egpakasamsam kandin, su due geem ne egpuun diye te
kandin ne egpakabawi kandan langun.



Due hep-at ne etew ne nanginguma ne migyayung te etew ne kene egkaweil se lawa.



Ne tenged te kasulug te me etew,
ware sikandan nakaparani ki
Hisus. Ne migweil-weil
sikandan, inlungahan dan
ka atep ne lenged
ni Hisus.



Ne hengkayi te nakalulungag e
sikandan, intuntun dan e ka etew
ne kene egkaweil se lawa ne
impeyibat diye te
hibatanan din.




Te pegkakita ni Hisus ne dakel ka pegpalintutuu ran,
migkahiyang din e ka kene
egkaweil se lawa, "Tatu,
impasaylu e ka me sale
nu." "Enew ka, wey
uyana nu ka
hibatanan nu wey
uli kad e diye
te kaniyu!"



Nataman, mig-untud e te balangey si Hisus duma te me hibateen din. Te sasangan e sikandan ne eglapas, sahuhune ne migpangalamag te makeseg, ne dutu, natimpaan e ka balangey te me bunlud. Piru newulep mule si Hisus.



Ne migkahiyán ni Hisus sikandan, “Mania te egkaaldek kew? Deisek ka pegsalig niyu!” Ne mig-enew sikandin wey insaparan din ka kalamag wey ka me bunlud. Ne due-rue ne migmalinawen e. Amana neinu-inu ka me duma rin wey migkahi, “Nekey-a etawa seini se minsan ka kalamag wey me bunlud, egpalintutuu kandin?”



Su miggeyinawaan
amana te Manama ka me etew kayi te
ampew te tane, sikan naa ka imbehey
rin ka sabsabeka ne Anak din su eyew
ka langun ne egpalintutuu wey egsalig
kandin, kene egpatey, ke kene,
egpakaangken te umul ne
ware egtamanan.



Ruma 3:23 su nakasale ka langun wey nakariyu-diyu e te kabantug te Manama.

Ruma 6:23 Su iyan bayad te peggimu te sale ka kamatayen, piru iyan dasag te Manama ka umul ne ware egtamanan tenged te pegsabeka ta ki Kristu Hisus ne Magbebaye ta.

Hibruwanen 9:27 Ka me etew, kasabeka re iya egpatey wey egkataman eggukuman e sikandan te Manama.

Ipisu 2:8,9 Su puun te keupiya wey keyid-u te Manama naluwas kew pinaahi te pegpalintutuu niyu ki Kristu, ne kene ne puun sika te hinimuwan niyu su dasag de kaniyu te Manama. Kene ne puun te me hinimuwan ta ne inluwas ki te Manama, purisu ware etew ne egpeggasal meytenged due.



Ruma 10:9,10 Su emun ke eg-angkenen nu ne Magbebaye si Hisus wey egpalintutuu ka te mapahetpet ne in-uyag sikandin te Manama, egkaluwas ka. Su eg-isipen ne matareng ka etew ne mapahetpet ne egpalintutuu, wey egkaluwas sikandin puun te peg-angken din te impalintutuuwan din.

Huwan 3:16,17 Su miggeyinawaan amana te Manama ka me etew kayi te ampew te tane, sikan naa ka imbehey rin ka sabsabeka ne Anak din su eyew ka langun ne egpalintutuu wey egsalig kandin, kene egpatey, ke kene, egpakaangken te umul ne ware egtamanan. Su ware ipeendini te Manama ka Anak din kayi te ampew te tane eyew te peggukum te me etew, ke kene, te pegluwas kandan.



1 Huwan 5:11-13 Ne iyan seini ka pegpamalehet, migbehayan ki te Manama te umul ne ware egtamanan, ne seini se umul diye migpuun te Anak din. Ka minsan hentew ne migdawat te Anak, duen e umul ne ware egtamanan. Piru ka ware migdawat te Anak te Manama, ware iya umul. Insulat ku seini kaniyu te migpalintutuu wey migsalig te Anak te Manama, su eyew egpakataha kew te due umul niyu ne ware egtamanan.



Matiyu 8-9; Markus 1-2, 4; Lukas 4, 8; Huwan 2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: E. Frischbutter; Sarah S.

Manobo, Matigsalug NT (mbt) © 2010, Wycliffe Bible
Translators, Inc. All rights reserved.

<https://live.bible.is/bible/MBTWBT/MAT/1>

©2026 Bible for Children, Inc.

www.M1914.org

www.bibleforchildren.org

